

## ALDIZKARIAK

# SASKI-NASKI



IRAKUR ETA ZABAL EZAZU

Ba-dira urte batzuk Saski-Naski aldizkaria sortu zala. Gure eskuetara eldu dan azkenengo zenbakia 41 da, eta urtarril-epaill-aldiari dagokio.

Ez da txantxetako lana gaur Eskalerrian aldizkari bat argitaratzea ta zabaltzea.

Zein dala, uste dozu, irakurle, aldizkari bat aterateko zeregiñik gaitxena? Ez, zalantza barik, idazleen urritasuna, idazleak ba-dagoz, eta idazle onak egon be. Ez irarkolako lana, gure irarkolak, utsak ugari izan arren, bear ba'da langilleak erdeldunak diralako, pizka bat gaiñean egon ezkeru ondo egiten dabe lana.

Eta arpidedunak? Erri txikia be ba-gara eta erri onen barruan euskeraz berba egiten dabenak ez dira asko eta onein artean be sarritan irakurteko zaletasuna ez da izaten aundia. Emen asten da ba, argitaratzaileen buruko miña. Baiña arpidedunak urri izatea be ez da arazorik aundiena, batez be aldizkaria aterateko bear diran langilleak euren lana geienetan duban egiten dabela jakiñik. Egia esan Saski-Naski'k idazleari ordaindu egiten dausku eta esker onez gagoz.

Arazoa diruaren urritasunetik sortzen da eta ainbat aldizkari ezin argitaratu izan ba'dira, orrexegaitik izan da: Irarkolako gastuak ordaintzeko beste diru iñondik ezin eskuratu izan dalako.

Asko poztuten gara ba, Saski-Naski'k olako oztupoak azpiratu eta aurrera jarraitzeagaz.

## ZELAKOA DAN

Gure irakurleen artean asko izango dira Aldizkari eder eta egoki au ezagutzen dabenak, baiña ori ta guzti be zeaztasun batzuk emon gura doguz.

Neurritz ZER baiño txikiagoa da, erdia inguru, eta orrelan aldean eroateko egokiagoa, baiña orrialdez askoz ugariagoa: eun orrialdetik gora izaten dauz eta ZER'ek 16 baiño ez.

Erabilten diran gaiak begiratu ezkeru, ba-dau ZER'en antza, barri-emote orokorra esaten dausenen barruan dagozelako, baiña ez da bardiña, beste jokabide batekoa baiño: Bere idaz-lanak munduan geien zabaltzen diran aldizkarietan artuak eta gaurkotasun aundikoak dira. Ez geienetan itzulpenak, gaia artu eta barriru egindako lanak, ber-idatziak, baiño. Eta gai oneik erabilteak irakurlearentzat atsegin-bide aundia sortzen dau.

## EUSKEREAA

Saski-Naski Euskerazaintzaren giroko aldizkaria da eta erakunde onek laguntza be emoten dautso. Orregaitik, darabillen euskerea erri-girokoa da. Idaz-lan batzuk gipuzkoeraz egiñak dira eta gipuzkoera argia ta erreza darabille eta beste batzuk bizkaieraz idatziak izanik bizkaiko euskera bateratua izaten da erabilten dabena, bateratua diñodanean, ez dot besterik esan nai auxe baiño: Bizkai'ko idazle guztiak bizkaieraz idazten dabenean darabillen euskerea dala. Guztiok dakigu Bizkai'ko euskerea ez dala bardin-bardiña Markiña'n eta Arratian, esaterako, baiña idazterakoan ez dozu igarriko zein dan markiñarra ta zein Arratiarra.

Aldizkarietatik artutako idaz-lanen artean, izaten dira idazleak asmatuak be, eta batez be sail bi dagoz oso irakurgarriak eta aldizkariak berak asmatuak diranak: *Bai ote dakizu* sailla, euskal kultura lantzeko egokia, eta tarteka sartzen diran barregaiak.

## EGILLEAK

Oñatibia'tar Iñaki eta Mendieta'tar Koldo dira zuzendariak, Oñatibia'tar Manu idazkaria, Edili Argitaldaria eta Graf. Igarri Irarkola.

Arpidetzea nai izan ezkeru, eta ez dozu izango damurik, auxe dozu zuzenbidea: Getaria Kalea, 21 beea. 20.005-Donostia. Urrutizkiña: (943) 42 84 59.

OLAZAR'tar MARTIN'ek